



## **la escuela de mias>>: PÚBLICA, ASTURIANA, LLAICA Y DE CALIDÁ**



La LOE, heriede ideolóxica y material de la LOGSE, sigue apostando pola convivencia de centros públicos y privaos concertaos, faciendo que los primeros vaigan pasu ente pasu morriendo al competir cola brutal superioridá de medios inducida de los segundos. Amás, les primeres etapes educatives, les postobligatories y la formación profesional en

formatu priváu gocien más que nunca de tol sofitu estatal. Manca tovía más la falta d'argumentos económicos na que sal esta Llei. Naide nun sabe qué va pasar col profesoráu, nin con qué perres van desendolcase les supuestes reformes si tolo que se prevé ye una suba d'un 0.25% nel gastu educativu.

Como pasare hai quince años, les prieses y l'ausencia de reflexón sobre'l fechu educativu –que non políticu- cola que s'elaboren estes lleis, faen pensar que l'enseñu d'equí p'alantre nun va tar meyor y que'l panorama de desigualdá nes escueles tiende a crecer, en cuentas d'un sistema nel que tol estudiantáu reciba les mesmes posibilidaes de desenrollu nes mesmes condiciones. Otramiente, ¿qué trai la LOE p'Asturies? Sábese que nel nuesu país delles escueles públiques tán en peligru grave al ponése-yos al par otros privaes que con una potencia aumentada pol sistema, acaben reventándoles. Sábese tamién que les bolses d'interinos tán yá tan hinchaes que bien podríen españar, mentes que'l númeru de places fixes que salen a concursu ye ridículu, a lo qu'esta reforma nun paez dar alternativa nenguna, alimentando la idea de que'l Principáu va siguir siendo un muérganu incompetente nesti tema.

Ye esperable que munches persones acabantes de llicenciase que deseyen trabayar nel enseñu sigan aceptando dir pa la privada concertada, xenerando una corriente de subemplegu que medra na profesión gracies a que l'Alministración subvenciona a estos centros, conduciendo a xente mui nuevo a unes condiciones llaborales pésimes, en cuentas d'invertir no públicu, dándo-y calidá a un enseñu pa toes y toos y fomentando la creación de bonos puestos de trabayu. Otru puntu alarmante ye la falta d'avance en materia d'integración social al traviés de la escuela que se deduz del tratamientu que de les enseñances se recueye na LOE.

Pero ye que tolos problemes qu'anguaño tien la comunidá educativa n'Asturies nun acaben na LOE. La entrada en vigor del Espaciu Européu d'Educación Superior va conllevar una adaptación de la universidá en tolos sentíos y niveles, modificando la forma de tresmitir les enseñances cola implantación de los denominaos "creitos europeos", una manera nueva de xestionar les hores de trabayu personal del alumnáu que paez apuntar más a un aumentu de les arques universitarias qu'a una verdadera meyoría del enseñu nesti nivel. La falta d'oficialidá ye un problema qu'afecta a bien d'ámbitos: a les y los docentes d'asturianu y gallego-asturianu, a l'ausencia de llibertá pa depender yá non sólo estos idiomas, sinón nellos, aguardando por un futuru nel que les y los estudiantes que quieran dir a la escuela cola so llingua como vehicular puedan facelo.



Pa igualar les oportunidaes y dar trabayu digne, apoyar lo públicu y lo de calidá, p'apostar nel enseñu más pola ciencia y menos pola creyencia, escuela llaica y inversión na investigación desanicando la precariedá, pa resolver un conflictu llingüísticu con implicaciones científiques, educatives y cotidianes, oficializar unes llingües, les nueses, que tien tolos papeles en regla pa ello.

## ecoloxía >>

### Incineradora de Serín: La comparsa d'IU-BA

Plasmu ye la pallabra que define'l sentir de la xente d'IAS-mias>> no que cinca a la postura que caltién la coalición IU-BA pa cola incineradora que COXERSA quier implantar en Serín.



El portavoz d'Izquierda Asturiana en Xixón, Pablo Rodríguez, afirmó que "IU-BA, meros comparses del PSOE, quieren agora llavar la cara con una auténtica ópera bufa" amestando que "resulta penoso que los miembros del equipu de gobiernu d'IU-BA se dediquen a estos xuegos malabares con un tema de tanta importancia pa la ciudadanía". Pa Pablo Rodríguez "esti fechu vien a axuntase a otres postures de la coalición integrante del gobiernu de la "izquierda plural" como lo socedió cola radioterapia, el Muselón o l'Helimer, onde IU indignase públicamente pero dempués, de facto, acaba asumiendo'l programa del PSOE ensin dignidá pa frañer el pautu de gobiernu."

Poru, dende Mocedá d'Izquierda Asturiana, afitamos el nuesu NON a la incineración de residuos sólidos en Serín y pidimos una xestión de los mesmos consecuentemente col mediu ambiente y cola salú públicu de les asturianos y asturianos.

**¡INCINERADORA EN SERÍN NON!  
¡QUE NUN QUEMEN LA NUESA SALÚ!**

## xusticia social >>

### Detenciones ilegales a inmigrantes n'Asturies

"Nos últimos meses, los ciudadanos y ciudadanes inmigrantes que viven y trabayen n'Asturies tán sufriendo un constante acosu policial. Na nuesa tierra asoceden, una tres d'otra, "identificaciones y detenciones preventives pola presunta estancia irregular nel estáu español", que la policía fai basándose namás nel color de les

persones o nel fechu de mercar un billete d'autobús o averase a una estación de tren y non n'actitúes delictives.



Esti ye l'entamu d'un manifestu firmáu por IAS-mias>>, ente otres organizaciones polítiques y sociales, como la Comunidá Africana de Residentes n'Asturies, énte l'increible acosu que ta careciendo'l coleutivu inmigrante nel nuesu país, onde se ta procediendo a detener y aplicar la llei d'extranjería a mozos y moces, tan asturianos como'l restu, que vienen al nuesu país a trabayar y lluchar por una vida digna lloñe del so llar. Dende Mocedá d'Izquierda Asturiana queremos afalagavos a sofitar esti manifestu y manifestar la solidariedá col coleutivu inmigrante, combatir activamente'l racismu y la xenofobia y defender una Asturies onde quepamos toes y toos ensin distinciones.

**¡STOP RACISMU! ¡NON A LA  
LLEI D'ESTRANXERÍA!**

## alcuentru >>

L'otru 28 de xineru **Izquierda Asturiana** celebró'l so V Alcuentru Nacional, onde se fizo un repasu de les xeres desendolcaes nel caberu añu pol partíu, col envís de facer el III Congresu d'Izquierda Asturiana enantes que fine esti 2006.

Nel Alcuentru marcóse la llinia política que va seguir desendolcando'l partíu y escuyóse una nueva Direición Nacional, onde **Mocedá d'Izquierda Asturiana** ta representada con un miembru. Nel ampliu repás que'l partíu espón nos documentos asoleyaos nel Alcuentru hai delles referencies a la puxante y nueva actividá de **mias>>**, dando-y dinámica de trabayu al restu del grupu y afitándose na importancia de seguir sofutando'l proyeutu de mocedá ensin complexos nin paternalismos, pola so importancia pa llegar a la realidá de la sociedá asturiana.



**¡LA LLUCHA SIGUE!**

## qué ye mias?>>

Somos un grupu de xente mozo que facemos por esparder una conciencia crítica colo que nos arrodiada dende una perspectiva asturiana y d'izquierda. La Ecoloxía, la Xusticia Social y l'Asturianismu son les exes de la nuestra actividá. Actividá que tien de ser fecha por y pa la mocedá asturiana, amosando que n'Asturies somos munches/os les/os que nun tamos d'alcuerdu col modelu actual, que nun vemos con bonos güeyos "l'autonomía" ruina y emprestada que nos "regala" l'estáu español, que nun asumimos como igua al nuestro futuru la emigración obligada, nin la explotación de los trabayos basura. Que nun callamos frente a la discriminación sexista que les moces tamos careciendo, nin a la implantación cuasi colonial de multinacionales,



nin al esfarrape del nuestro mediu ambiente... Trabayamos pa da-y al nuestro país otra traza. Queremos una Asturies respetuosa col mediu, ensin xéneros, que s'enfrente a la globalización del beneficiu pa cuatro, pa mundializar los drechos sociales y llaborales. Una Asturies arguyosa de la so identidá, de la so cultura y llingua, una Asturies soberana, dueña del so futuru y qu'apueste pola democracia participativa con una ciudadanía protagonista de les decisiones que-y afecten. Una Asturies llibre, onde la opción sexual nun seya torga pal desenvolvimientu social. Queremos ser la mocedá que faiga por otra Asturies, la de la xusticia y la llibertá. Ente toes y toos vamos construyir la nuesa Asturies.

**Mocedá d'Izquierda Asturiana**

[www.ias.as/mias](http://www.ias.as/mias) >> [mias@ias.as](mailto:mias@ias.as)

Primo de Rivera, 1, Oficina 9. 33001 Uviéu.